

24. oktober 2018

UKA 2018/139

**Kalaallit Nunaanni sumiiffinni amerlasuuni unammilleqatigiinneq amigarsinnaasaraluartoq ataqqillugu piffissap ilaani biilnik misissuisarnissamut siunnersuusiortussanik suleqatigiissitamik suligasuartussanik ataatsimoorluni pilersitsinissaq kissaatigalugu danskit Transportministereqarfiannut saaffigineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Steen Lynge, Demokratit)

Siullermik siunnersuuteqartoq Steen Lynge Demokratineersoq Siumumiit qutsavigiumavarput aalajangiiffigisassatut siunnersuutaanut soqutigintumut.

Siumumi isumaqarpuguttaaq biilit ingerlatsisumut, ilaasunut aammalu avatangiisinut navianartorsiortitsisinnaaneq eqqarsaatigalugu isumannaatsuusariaqartut.

Aqqusinermi assigisaanilu angallaneq angallassissutillu eqqarsaatigalugit inatsiseqarnikkut danskit oqartussaasuinit suli akisussaaffigineqarpoq. Tamassumap ilaatigut aamma kinguneraa angallassissutit nakkutigineqarnerat misissuiffigineqartarnerallu danskit oqartussaasuinit aamma akisussaaf-figineqarmat.

Inuit tamat angallaffiini isumannaannerpaamik avatangiiseqarnissaaq pingaaruteqaqaaq. Tamatumani pingaaruteqarluinnarpoq angallassissutit eqqarsaatigalugit isumannaatsumik inissisimasoqarnissaa. Biilit tamarmik illersorsinnaassuseqartumik atuisunit atorneqarsinnaanissaat pingaarute-qaqaaq, taamaattumillu akuttunngitsumik biilit misissorneqartarnissaat aqutissaasariaqarpoq qulakkeerneqartariaqarlunilu. Danskit oqartussaasuisa biilit misissorneqartarnerat misissorneqartarnissaallu akisussaaffigaat, tamannali ukiorpassuarni suli pisimangitsoq aamma oqaatigineqarpoq. Tamanna ernumanarpoq piaarnerpaarlu atorlugu qanoq iliuuseqarfigineqartariaqartoq Siumumi isumaqarpugut.

Aqqusinertigut atugassarititaasut ilaatigut pissutaallutik sumiiffiit ilaanni biilit sukkanerusumik aserfallakkiartarnerat takornartaanngilaq, taamaammallu isumannaallisaaneq eqqarsaatigalugu pingaaruteqarluinnarpoq piffinni tamani biilit misissorneqartarnerisa nukittorsaavigineqarnissaat qulakkeerniarneqarnissaallu.

Biilit isumannaatsuunissaat eqqarsaatigalugu politiit qaqugukkulluunniit misissuisinnaatitaanerat qujanartumik inatsisitigut qulakkeeqqavarput, tamannali naammangilaq. Siumumilu isumaqarpugut piffinni tamani biilnik misissuisinnaanerup qulakkeerneqarnissaanik sulinerup ingerlaannartariaqarnera qulakkeerneqassasoq, soorlu tamanna aamma Naalakkersuisunit suleqatigiissusiortoqarnikkut qulakkeerniagaasunut ilaasoq.

Naalakkersuisut kaammattorusuppagut ajornartorsiutaasup massumap aqqiivigineqapallannissaa siunertaralugu suliamik pimoorussumik pilertortumillu ingerlatseqqullugit, aqqusinertigut assigisaatigullu angallannerup sapinngisamik isumannaannerpaamik inissisimanissaa qulakkeerneqartariaqarmat.

Naalagaaffiup biilit misissorneqartarnerannut isumaginnittuunera ukiuni kingullerni namminersortunngorsarlugu suliarineqarnikuuvoq, tamassumalu nunatsinnut ilaarniinnarluni iliuuseqarfiginissaa ajornakusoortussaaqisoq Siumumi isumaqarpugut. Unioneruaallaasanngilarmi piffiit ilaanni biilileriffeqarnikkut annertuumik unammilligassaqarneranik oqariartuuteqarutta, taassumallu misissueriaatsinik qanoq atugassaqartitsisoqarnera takuneqarsinnaasunngorlugu qulaajaavigineqarsinnaasariaqarpoq.

Siumumiit naatsumik taamatut oqaaseqarluta siunnersuut manna akuersaarlugu ataatsimiititaliamut susassaqtumut suliareqqitassanngorlugu inassutigaarput.

Anders Olsen, Siumut.